



weil wir



#bamberglieben

Kuädswohlprogramm

füä di Schdoddroodswohl

am 8. Märds 2026

www.gruenes-bamberg.de

Bildung

Miä wolln meärä Geld dofüä, dass di Schulhäusä saniäd wärn, füä di Digitalisierung und dass di Kinnä aa am Nochmiddoch in dä Schul bleim können. Doäd solls – moll a weng gschwolln ausgedrüggt - „vielfäldiche bädagogische Kondsebbde und inclusive Lernweltn“ geem.

Di Besdaloddsischul in Bambärch-Ost müssmä züüchich ausbaua, wechä di Haufn neua Familien, diis edsädd doäd gibd. Abä doo dädsu wollmä fai aa nuch an gands neua Grundschulschdandord füä Bambärch-Ost.

Ausbaua wollmä aa di Schulsodsialärbädd o alla Schuln.

Und um di Schuln rum soll Dembo 30 geldn, soweids hald gädd.

Bürchä:innenbedeilichung

Di Bürchä:inna solln bessä informiäd wärn und aa meärä midendscheidn können.

A dransbarenda Schdoddrodsärbädd grichd mä gands leichd, wemmä di Sidsunga onlein obhäld, so dass mä übers Indänedd dsuguggn und dsuhöän ko.

Miä wolln an Bürchähaushald: Den solln alla guud väschdeeh können und der soll so sai, dass mä na mid Such- und Fildäfungdsion im Indänedd oschaua ko. Und dass di Bürchä:inna iära Ideen und Meinunga in Onlein-Umfroong, Dialoche und a Onlein-Bladdform eibringa – des weär fai aa ned väkeäd.

Undäschdüddungsongs, wo di Bürchä füä iära Brojeggde Geld beondroong können, hommä ja scho eigfüähd. Dii wollmä beibehaldn.

Subbä weä a Bambärch-Äbb – di könnäd übä alla Sörvices vo dä Schdodd informiän.

Füä di Juchndlichn solls Juchndkonfäreendsn geem, so dass di aa a Forum und a Stimm in unnärä Schdodd hom.

Energiewendn

Miä wolln a Energiewendn, di sodsiool gerähd iss. Troong muss des di Schdood, dsamm middi Schdoddwärgge, di Energie-Genossnschafdn, middä lokoln Wärdshofd und Brivadpersona, und aa dsamm middm Landgreis.

Di Energieberodung soll ausgäbaud wärn.

Miä leeng a Föädäbrogramm für Balkong-Solaronloong auf. Miä undäschdüdsn so modärns Dseuch wie Miedäschdroom odä di gemeinschafdliche Gebäudeväsorhung (GGV) genauso wie dynamischa Schdromdarife.

Es iss doch kloä, dass auf di schdäddischn Gebäude Foddovoldaig-Anloong mondiäd wärn müssn.

In unnärä kommunaln Wärmeblanung wärd selbsdväschdändlich sowos wie Grafd-Wärme-Kobblung, Großwärmebumbm, Wärmenedse und Fluss- und Eädwärme mid nei gebloond.

Glimaschuds und Grün in dä Schdodd

Ka Frooch: Miä müssn füä meärä Grün in dä Schdodd sorng – wechäm bessän Glima, wechä Oardnvielfald bei di Inseggdn und so und aa dsän Schudds, wenss bei Schdargreeng wie aus Küübln schüdd. Des iss des Schwammschdoddbrindsieb.

Miä braung a Endsiechelungs-Schdradechie, und wenn dann amoll endsiechld iss, dann müssn di Fläch n gscheid begründ wärn.

Blädds, Höf und Bargblädds müssmä künfdich väsiggerungsfähich machn, also dass äs Wassä hald nei di Eärden kummd. Ebeneärdicha großflächicha Bargblädds sollädn – wenss noch uns gädd – goar nimmä genehmichd wärn.

Aans is sichä: Di Schdodd gewinnd durch meärä Baam und Grünonloong. Di Baamscheim vo di Schdoddbaam solln a wengla grössä wärn und naduänooh bebflandsd. Öffendliche Grünfläch n solln ökologisch gebfleeched wärn, so dass doäd aa aweng wos wilds wäggsd.

Dass Fassoodn und Dächä begründ wärn – des wollmä föädän.

Di Frischlufd-Schneisn vom Schdoddronnd nei ins Schdoddsendrum därfn nedd durch urchenda Dseuch undäbrochn wärn, des do nei gebaud wärd.

10 Brodsend vom schdäddischn Wald soll Naduäwald sai. Äs klaana Naduäschudsgebiet, des mä auf dä MUNA scho homm, wollmä noch Noäd n bis hii dsuä Geisfeldä Schdross äweidän. Und di Sandleemsräum aufm ehemolichn Schießblodds wollmä als neus Naduäschudsgebiet ausweisen.

Den Andeil vo di Bidoobfläch n am gsamdn Schdoddgebiet däädmä gärn vägrössärn, vo 13 auf 20 Brodsend.

Kulduä

Miä wolln di vielfäldiche Kulduä in Bambärch in alla iära Faceddn schdüsn und föädän. Weil dii iss echd glasse.

Raum füä Kulduä solls künfdich im Kesslhaus geem. Des wollmä langfrisdich dsäm Kulduäsendrum ausbaua. In di Reidhalln auf dä Lagarde soll a sodsiokuldurells Dsendrum nei kumma. Des hassd: nedd nur Kulduä, aa Raum füä bürchäschofdlichs Angaschmang solls doäd geem.

Mancha Häusä odä Läd n schdänn leär. Däweil könnäd mä di doch dswischnnudds n für Kulduä, bis widdä wos neus nei kummd, odä nedd? Dsäm Beischbiel im ehemolichn Schlachdhof.

Miä glaam, dassäs a guuda Sach iss, wenn solcha Insdidudsiona wie äs Deadä, di Museen, di Schdoddbüchärei odä di VHS mid denna Leud vo dä freia Kulduä dsammärbärn.

Di freia Kulduä välongd mid Rechd, dass si dsuvälässich finandsiell geföädäd wärd. Deswechä undäschdüsn miä a denna iära Foädärung, dass im Joä füm f Brodsend vom gsamdn Kulduähaushold nein Globoolbedrooch Kulduä, also nei di freia Szena, fließ n solln.

Di Leud in dä freia Kulduä ko di Schdodd aa nuch annärsch undä di Arm greifm: Di braung a weng an Ausdauß und a Beradung, odä dass ännä aanä im Behöädndschungl hilfd odä däbei, wie mä dsä Föädämiddl kummd.

Miä findn, dass es in dä Schdodd genuch Draußn-Kulduä geem muss, doo wo mä ned gedswunga wäd, wos gehä Geld dsä konsumiän. Ajeeds soll Kulduä grieng könna. Deswechä wollmä üba di SozCard di Ämäßichunga weidä ausbaua.

Mobbilidääd

Di Väkeäsmiddl vom Umweld-Väbund (dsä Fuß, middm Rood odä middm Bus) wollmä addragdivä machn – des is ja gloa. Losdnrädä, Carschäring, Barg & Bige, Dschobdigged, neua Logisdigkondsebbe usw. wollmä gedsield föädän.

Om Boonhof soll alläs dsammkumma, wie bei annä richdichn Mobbilidäädsdrehseim, also mid am Rechionaln Omnibusboonhof (ROB) und mid am gscheidn Foorrodbarghaus.

Füä di Leud aufm Foorrod brauchmä Roodweech, di sichä sänn, genuch Schdellblädds füä iära Rädä, Ciddyruudn queä durch di Schdodd und Roodschnellweech nausn Landgreis.

Miä sänn für Dembo 30 übaroll doäd, wos möchlich iss, wechä dä Väkeässichäheid und dass sich kannä därennd.

Füä di Gschäfd in dä Innaschdodd gibds heuddsädooch so genannda „Ciddy-Logisdig-Süsdeeme“. Des solläd mä aa moll in Bambärch ausbrobiän.

Und wenn scho Audo, dann hald möchlichsd eleggdrisch. Obä für di E-Audos brauch mä hald scho nuch a wengäla meärä Infraschdrugduä, also Loodesäuln übaroll in dä Schdodd.

Doss so a boa Kaschbä iära E-Scuudä alläweil middn nein Weech schdelln, dassd halbäd noobolläsd – des iss a woora Blooch und a Gfrägg, und däs köäd sich ned. Des muss aufhoän, wo käämmäd mä doo hii?! Deswechä solln di künfdich bloos nuch in schbeziella Abschdelldsona noogschdelld wärn dürfn. Nochäd issa Ruh!

Wemmä blond, wie di Bus in Bambärch foän, müssäd mä meära di Leud froong, di selbäst middm Bus undäweechs sänn, weil dii homm di meisde Ohnung.

Sodsiools

Füä a guuda Sodsioolbolidigg muss mä dsäärschd auf di Schdodddeile guggn. Doäd brauchd mä Schdodddeildsendren. Weil in denna gibds Möchlichkeidn, dass mä sich zamhögg und blaudärn koo. Nochäd endschdeed aa sowos wie Nachbäschofd odä sodsiools Angaschmang odä a weng a Onschbrooch dswischä alda und junga Leud und nuch meärä. Im Schdodddeil mussmä naduälich aa gscheid eikaafn könna, wos mä hald am Dooch so brauchd.

In Bambärbch gibds edsädd a Brojeggd, des hassd auf englisch „Care im Quartier“. Des iss a feina Sach und miä wolln des ausbaua. Doo wärd Hilfe in dä Nohbäschofd füä alda Leud brofessionell organisia, also Freiwillicha helfm am aldn Menschn, deä beiänna ums Egg wohnd.

Di Angehörichn vo alda Leud braung aa amoll a Äholung, und dafüä müssäds meärä Kurdsdseidbflecheblädds geem.

Im Roodhaus solls a neua Koordinadsionsschdeln geem, wo alla Leud hii könna, di a Hilf braung. Doäd wärd änna dann gsochd, wo si weidä hii müssn, und si grieng a guuda Beratung. Im Dschobbcendä gibds immä widdä amoll Konfligde – doo weä sowos wie a Ombudsschdeln guud, di schlichdn könnäd.

Wohna

Es gibbd eindeudich dsä wenich Wohnunga in Bambärbch, doo braung mä gar ned schdreidn.

Um neua dsä grieng, könnäd mä noochvädichdn, also doädhii baua, wo nuch freia Lüggn sänn. Mä könnäd aa auf mancha Häusä nuch a Schdoggwärg oom nauf baua odä äs Dachgschoss ausbaua. Es gibd dsägoä Fläch, dii scho väsiechld sänn, auf di könnäd mä baua. Odä in so leera Gewärbehüddn könnäd mä sich aa Wohnraum drinna voäschdeln. Aufm früärn Schlochdhofgelände weä doo fai einichäs dsä machn.

Di Schdodd solläd am bäsdn alla Grundschildügg kaafm, di in Bambärbch dsä väkaafm sänn. Doäd könnäd di Schdodd dann selbäs fä neua Wohnunga sorng – übä di Schdoddbau GeämbeHa füä an sodsiooln Wohnraum und ned füä an deuern, des väschdädd sich ja vo selbäs.

So schnell wies gädd wollmä a neua Dsweggendfremdungssadsung. Übä di kommä dann vähindän, dass Wohnraum väschwind und dodrinna blöddslich Fäjenwohnunga sänn, odä Braxn odä Büros odä einfoch bloos leeä schdädd.

Wo mancha Leud dsä vill Wohnraum homm, den si selbä goä nedd braung und nedd nudsn, doo könnäd mä si berodn, dass si dann välleichd doch vämiedn: wie si saniän odä umbaua könnäd, und welcha Föädämöchlicheidn es dädsu gibd.

(Unser Bambärbch-Fränkisch orientiert sich an der Schreibweise des geschätzten Bamberger Schriftstellers Gerhard C. Krischker.)